





朝南苑是陸機宅其詩云王子耽立言賢豪多在  
門好鵝尋道士愛竹嘯名園樹色老荒苑池光蕩  
華軒北堂見明月更憶陸平原掃地青玉簞為余  
置金尊醉罷欲歸去花枝宿鳥喧何時復來此再  
得洗囂煩圖經云在縣南五里秦淮之側

### 杜姥宅

建康實錄晉成帝恭皇后杜氏母裴氏即杜宏治  
之妻也裴氏名穆孝武帝封為廣德君初穆渡江  
宅於南掖門外時裴氏壽考故呼為杜姥圖經云  
在舊縣東北三里舊縣在冶城今天慶觀之東是  
也其宅未詳所在

### 劉子珪宅

六朝事迹編類卷之七

南史齊劉瓛字子珪居於檀橋瓦屋數間上皆穿  
漏永平七年竟陵王子良表武帝為立館帝以揚  
烈橋故主地給之檀橋在今縣東二十五里青龍  
山之前

### 沈約宅

南史梁沈約遷尚書令雖名位隆重而居處儉素  
立宅東田瞻望郊阜嘗為郊居賦以敘其事東田  
在鍾山之下也

### 朱异宅

南史梁朱异及諸子自潮溝列宅至青溪其中有  
臺池玩好每暇日與賓客遊焉

### 孫瑒宅



建康實錄陳起部尚書孫瑒居處奢豪宅在青溪東西即江總宅瑒家庭穿築極林泉之致歌童舞女當世罕儔

### 江令宅

陳尚書令江總宅也建康實錄及楊修之詩注云南朝鼎族多夾青溪江令宅尤占勝地後主嘗幸其宅呼爲狎客劉禹錫詩云南朝詞臣北朝客歸來惟見秦淮碧池臺竹樹三畝餘至今人道江家宅今城東段大夫約之宅正臨青溪即其地也故王荆公詩云昔時江令宅今日段侯家此可驗也

### 宋齊上宅

舊傳在鎮淮橋之北御街之東今南北較務是也其後又爲南唐國子監

### 烏衣巷

王謝金陵人世以航海爲業一日海中失船泛一木登岸見一翁一媪皆衣阜引榭至所居乃烏衣國也以女妻之旣久榭思歸復乘雲軒泛海至其家有二燕棲於梁上榭以手招之即飛來臂上取片紙書小詩繫於燕尾曰誤到華胥國裏來玉人終日苦憐才雲軒飄出無消息灑淚臨風幾百回來春燕又飛來榭身上有詩云昔日相逢冥數合如今睽違是生離來春縱有相思字三月天南無鴈飛至今歲竟不至因目榭所居爲烏衣巷劉禹錫有詩曰朱雀橋邊野草花烏衣巷口夕陽斜舊



時王榭堂前燕飛入尋常百姓家此見圖經云在縣東南四里晉書王導紀瞻宅皆在此巷

扶南樂署

建康實錄吳赤烏七年扶南國獻樂人於此置舍以教宮人在縣北二里

乘黃署

輿地志云在東府之西北五輅及朝車凡駕馬者之所去縣東北六里

銅螭署

臺城刻漏署西本洛陽之舊物宋平姚秦遷於此魏明帝為太子時玩以玉手板刺螭口中因入不出後人常見白螭在其中梁元帝移之江陵此

六朝事迹編類卷之七

後遂不復見楊修之有詩云挈壺傳箭逼天聰鑄出蟠螭巧範同何事腹中藏怪物人驚螭氣如虹

錦署

圖經云在縣東南十里宋遷百工於此也楊修之有詩云人衣縵縷地衣紅不念家家杼柚空厥篚織文應歲貢更翻新樣集機工

紙官署

輿地志宋永初中舊立齊高帝於此造銀光紙以賜王僧虔在縣東一十五里

焚衣街

齊東昏侯自製服為四種冠五私袍一月中二十



餘出晨出三更歸夜出清晨返梁自襄陽出師廢  
之焚奢淫服六十二種於御街中楊修之有詩云  
雉頭金縷又珠胎煙緒香雲晝不開御路傍人皆  
歎息逡巡紅焰作青灰

六朝事迹編類卷之七終

光祿寺署正上元李濱古漁重校刊